



SAKSFRAMLEGG

Saksnr:	Utval:	Dato
	Bygdeutviklingsutvalet	

Sakshandsamar:	Arkiv:	ArkivsakID
Tore Henrik Øye	FE-223, FA-V12	23/300

HANDSAMING AV SØKNAD OM BYGDEUTVIKLINGSMIDLAR TIL LEIKEPLASS PÅ HAUGANE, STANGHELLE

Vedlagte saksdokument:

Søknad om bygdeutviklingsmidlar - Opprusting av leikeplass og sosial møteplass Stanghelle

Kommunedirektøren sitt framlegg til vedtak:

Bygdeutviklingsutvalet løyver inntil kr. 20 000,- i bygdeutviklingsmidlar til Stanghelle Vellag For innkjøp av nytt leikeutstyr til bruk på leikeplass ved Haugane på Stanghelle.

Tilskot vert løyvd som eit fastsett tilskotsbeløp. Beløpet skal nyttast til tiltak som går fram av søknaden.

Tilskotet vert betalt ut etter innsending av sluttrapport, med betalingsoppmoding og kostnadsdokumentasjon (faktura, bilete m.m.).

Løyvinga gjeld i to år, fram til og med 01.10.2025.

Saksopplysningar:

Samandrag/konklusjon (kort om saka)

Bygdeutviklingsutvalet har kr. 265 000,- til fordeling ved søknadsrunden i september 2023. Det er samla sett søkt om kring kr. 760 000,- i tilskot, fordelt på 11 søknadar.

Stanghelle Vellag søker på vegne av bustadområde på Haugane, ved Meline Heimdal Haugland, om kr. 46 100,- i tilskot for å kjøpe inn nye leikeapparat til leikeplassen på Haugane.

Kommunedirektøren vurderer at tiltaket er i tråd bygdeutviklings-midlane sitt føremål om å leggje til rette for aktivitetar og opplevingar i lokalsamfunnet.

Med bakgrunn i innkome søknadar og tilgjengelege midlar, er innstillinga å løyve inntil kr. 20 000,- til innkjøp av nye leikeapparat.

Bakgrunn for saka

Bygdeutviklingsutvalet har lyst ut ny søknadsrunde for bygdeutviklingsmidlane, med kr. 265 000,- til rådvelde, i tillegg til restmidlar frå tidlegare tildelingar (kr. 15 000,-).

Det kom inn 11 søknadar, med ein samla søknadssum på om lag kr. 760 000,- (omtrentleg overslag).

Søknad frå vellaget er sendt på vegne av bebuarane på Haugane. Søknaden kom inn etter søknadsfristen den 28. august, men sidan det også er fremja søknad om tilskot ved tidlegare søknadsomgang, utan at den vart teken opp til vurdering (mangelfull informasjon), finn Kommunedirektøren grunnlag for handsaming ved denne omgangen.

Målet med bygdeutviklingsmidlane er å skape opplevingar og aktivitetar som er opne og tilgjengeleg for alle, og som skapar trivnad i bygdene. I dette høvet kan lag, organisasjonar, verksemdar og einskildpersonar søkje om tilskot til prosjekt eller gjeremål med ålmennytting verdi.

I søknaden vert det søkt om kr. 38 600,- til opprusting av leikeplassen, tilsvarande innkjøpskostnadane. Total kostnad er sett til kr. 46 100,-, inkludert dugnadsarbeid, sjå kostnads- og finansieringsplan under:

Tekst	Kostnadar	Finansiering
Dissestativ	14 500,-	
Vippehuske	10 200,-	
Sandkasse med lokk	2 000,-	
Benk	6 900,-	
Diverse fundament	5 000,-	
Verdien av eige arbeid	7 500,-	
Tilskot frå Bygdeutviklingsutvalet		38 600,-
Dugnadsarbeid/eigeninnsats		7 500,-
SUM	46 100,-	46 100,-

Det går fram av søknaden at leikeplassen på Hugane er mykje nytta av born i bustadområdet/ nabolaget. Dagens leikeapparat er mogne for utskifting, og det vert difor lagt opp til innkjøp av nye. Leikeplassen er open for alle, og ei fornying vil gjere den meir innbydande, spanande og funksjonell, i følge søkjar, som også peikar på plassen som ein sosial møteplass.

Restaurering og vedlikehald vil bli gjort på dugnad.

For nærare informasjon om tiltaket, vert det vist til søknaden.

Formelt grunnlag:

- «Retningslinjer for tilskot til bygdeutvikling», vedtekne 26.05.20.
<https://www.vaksdal.kommune.no/innhald/landbruk-nering-og-skatt/bygdeutvikling/retningslinjer-for-tilskot-til-bygdeutvikling/>

Vurdering og konsekvensar:

Søknaden vert vurdert som tilstrekkeleg opplyst for sakshandsaming og vedtak etter gjeldande krav.

I følge bygdeutviklingsmidlane sine retningslinjer, skal midlane brukast til ålmennyttige føremål og leggje til rett for aktivitet i bygdene, med varierte opplevingar og levande bygdeliv. I dette inngår stønad til konkrete prosjekt, tiltak og aktivitetar, som gjeldande søknad høyrer inn under.

Kommunedirektøren vurderer at planane om opprusting av leikeplassen på Haugane, er i tråd med bygdeutviklingsmidlane sitt føremål, og i kjernen av kva midlane skal leggje til rette for. Her vert det lagt ekstra vekt på at tiltaket er retta mot born.

Leikeplassen ligg på privat grunn, og er ikkje i offentleg eige.

Det kom inn mange søknadar til gjeldande søknadsomgang, med søknadsbeløp langt over midlane som Bygdeutviklingsutvalet har tilgjengeleg. Dette stiller krav til prioritering mellom søknadane.

Med bakgrunn i tiltaket sitt innhald og ei samla vurdering, går Kommunedirektøren inn for å løyve inntil kr. 20 000,- til opprusting av leikeplassen på Haugane. Dette er kr. 18 600,- mindre enn kva det vart søkt om.

Innstillinga er å gje tilskotet som eit fast beløp, utan å knyte summe opp mot ei prosentvis finansiering av «godkjent kostnad». Dette tydar at søkjar kan nytte kr. 20 000,- så langt som summen rekk, til innkjøp av leikeutstyr, med utbetaling etter kostnadsdokumentasjon.

Bygdeutviklingsmidlane sine retningslinjer seier at det skal takast omsyn til geografisk fordeling ved bruk av midlane, og at bygder som ikkje har fått midlar tidlegare, skal prioriterast. I dette høvet har dei aller fleste bygdene i kommunen fått tildelingar, som regel fleire gonger, også Stanghelle. Desse vurderingane er tekne med i handsaminga av søknaden.